



Kabarett „Sachsenmeyer & Co.“
09224 Chemnitz
Feenweg 11

Hauptspielstätte:
Kabarett-Kiste (im Hedwigshof)
An der Markthalle 8
09111 Chemnitz

Bestell-Telefon: 0371 - 694 77 11
www.sachsenmeyer-kabarett.de
e-Mail: sachsenmeyer@t-online.de

12. Kalenderwoche – ab 20. März 2011

Sießholz

Ma ganz ährlisch - isch hab nischd geeschn vorliebde junge Leide... mor is ja schließlich ooch ma jung gewähsn! - abor isch kanns nisch leidn, wenn isch zuguggn muss, wie die sisch gnudschn dun un sisch umärmln, dass de Angsd ham mussd, die kenndn jedn Momend in de Horrizondale ieborgehn! Das is mir irschenwie beinlich.

Noch beinlichor wirts mir abor, wenn nisch mähr junge Vorliebde effendlich rundurdln dun. Womeeschlich welsche, die schon nahe an dor Grenze zur Rende sin odor driebor.

Nisch, dass isch dähnen das nisch genn due - nee, abor isch will nisch zuguggn missn!

Un wenn nu grade in dor Gadschdäde sisch welsche genau dir geeschniebor hinsedzn dun... na, da kannsde ooch schleschd wegguggn. Immor bloß an de Degge guggn, da grischsde ja Geniggschdachl. Zum Gligg hadde isch eene Zeidung dabei. Da habsch nu indensief neingeguggd, um das Dheador driehm am Disch geeschniebor nisch anguggn zu missn. Am Ende, wo die dann endlich widdor gegang sin, habsch die Zeidung auswendisch gekonnd!

Abhaun konnde isch abor ooch nisch, weil isch ja off meine Gudste wardn mussde, die misch in dor Gadschdäde abgesedzd hadde, weilse in Ruhe was einkoofn wollde. Isch däde immor so drängeln. Alleene hädde se viel mähr Genuss am Einkoofn!

Ogeh, eh isch misch schlachn lass, sedz isch misch in de Gadschdäde un drink e Bierschn - odor zweeje - un warde bis meine Gudste ihrn Koofrausch ausgelähbd had. Isch konnde ja nisch ahnen,

was das Schigsahl sisch fiehr eene Briefung fiehr misch ausgedachd hadde. Ehm e sähr schbädes
Liebesbaar - direggd mir geeschniebor!

Un dähr alde Kerl had gesäusld...ja, Schadz... bidde Schadz... un meschesd du was drinkn,
Liebes... Schadz schau mal... ach, Liebes... nein, wirglisch mein Engel... ach, Schadz...

Mir is ährlisch beinahe dor Gaffee vom Friehschdigg hochgekomm. Soviel Schmalz vordraach isch
einfach nisch! Vorsischdshalbor habsch mir gleisch ma noch een Maachnbiddor beschdelld.

Dor Schadz had nisch viel gesachd, abor immor sähr gligglisch geguggd un faldnreisch geläschld!
Se hadde iebrischens so dreggschblonde lange Haare un eene graue Schdriggjagge an. Dazu war se
ziehmlisch vorschnubbd un had dauornd dähn Rodz so hochgeschniefd. Un een Busn hadse
gehabbd wie eene Amme, die Drillinge vorsorschn muss. Dor Galahn hadde eene Drachdnjagge an
un had sähr Hochdeutsch gereded. So e bißl ieborkandiedld! So falsch!

Dass die das nisch rausgeheerd had, dass der bloß Sießholz raschbln dad...?! Bloß hohle Flogln!?
Isch hab das zähn Medor geeschn dähn Wind rausgeheerd! Ohne hinguggn!

Nee, ährlisch - da bin isch annersch! Wenn isch zu minor Gudstn ma saache... du dumme Kuh! -
dann is das dodahl ährlisch gemeend un kommd eschd vom Härzn!

Eduard Sachsenmeyer